

दिनांक : 01.01.2026

समय : 18.45 बजे

- राष्ट्रपति द्रौपदी मुर्मू कह्यो—आर्टिफिशियल इंटेलीजेंस रो महतव बधण रे साथै ई सगळां लोगां सारु इण ने सीखणो जरूरी व्हे ग्यो है।
- रेलवे बेगा ई वंदे भारत स्लीपर रेल चलावेला।
- दुनियाभर मांय नुवो साल रा जळसा री धूम—प्रदेश मांय मिन्दरां अर सैलाणी ठौड़ा माथे लोगां री भीड़।
- प्रदेश मांय केई ठौड़ां मावठ अर कोहरा ऊँ ठण्ड बधी—आवण वाळा तीन—चार दिनां मांय पारा मांय और कमी रा आसार।

000

राष्ट्रपति द्रौपदी मुर्मू कह्यो है के आर्टिफिशियल इंटेलीजेंस तकनीक ए.आई. रे साथै देश मांय सकारात्मक बदलाव लावण रो एक मौको है। वे राष्ट्रपति भवन मांय आर्टिफिशियल इंटेलीजेंस सारु कौशल विकास—एसओएआर रे तैत एक खास कार्यक्रम मांय बोल री ही। राष्ट्रपति कह्यो के न्यारा—न्यारा हलका मांय आर्टिफिशियल इंटेलीजेंस रो महतव तेजी ऊँ बध रियो है अर अबे हर किणी सारु ई तकनीक ने सीखणो जरूरी व्हे ग्यो है।

.....

राष्ट्रपति मुर्मू तकनीक री मार्फत भारत रा जिम्मेदार भविष्य ने आकार देवण री अरज करी। कार्यक्रम रे दौरान दौरान राष्ट्रपति पढेसरा अर सांसदां ने एआई प्रमाणपत्र सूप्या अर 'स्किल द नेशन चैलेंज' नाम रा राष्ट्रीय जागरूकता अभियान री सरुआत करी।

000

रेलवे बेगा ई वंदे भारत स्लीपर रेल चलावेला। रेल मंत्री अश्विनी वैष्णव और ऐलाण करता कह्यो के देश री पैली वंदे भारत स्लीपर रेल गुवाहाटी अर कोलकाता रे बीचे चालेला। वणा कह्यो के रेलवे स्वदेशी तरीका ऊँ डिजाइन अर बणी वंदे भारत स्लीपर रेल रो आखिरी हाई—स्पीड परीक्षण कामयाबी पूरण पूरो कर लीरीज्यो है।

.....

श्री वैष्णव बतायो के 16 कोच वाळी आ स्लीपर रेल एक हजार ऊँ डेढ हजार किलोमीटर लंबी दूरी ताई री जातरा सारु सरु करी जाय री है। बणा बतायो के आ रेल आरामदायक स्लीपर सीट, स्वचालित दरवाजा अर आधुनिक शौचालय समेत नुवी सुविधावां वाळी व्हेला।

000

आखा देश रे साथै ई उत्तर—पश्चिम रेलवे मांय नुवी साल री सरुआत र साथै ई रेलगाड़ियां री नुवी समय सारिणी लागू व्हे गयी है। उत्तर—पश्चिम रेलवे रा मुख्य जनसंपर्क अहलकार कैप्टेन शशि किरण बतायो के नुवी समय सारणी मांय नुवी रेलों रा संचालन, रेलों रा फैलाव, फेरा मांय बढ़वार, रेल रा नम्बर मांय बदलाव, नुवा ठहराव अर न्यारा—न्यारा टेशणा माथे रेल रे आवण—जावण रा बगत मांय बदलाव व्ह्यो है। वणा बतायो के 66 रेलगाड़ियां रा न्यारा—न्यारा टेशनां माथे आवण जावण रा बगत मांय 30 मिनट अर बत्ती रो बदलाव व्ह्यो है।

.....

इण रे साथै ई आज ऊँ रेलवे रा न्यारा—न्यारा दर्जा रा किराया मांय मामूली बढ़वार व्ही है।

000

केंद्रीय कृषि अर ग्रामीण विकास मंत्री शिवराज सिंह चौहान कह्यो है के विकसित भारत जी—राम—जी योजना मजूरा सारु रुजगार ने बधावो देवेला। वणा काश्तकारां, मजूरा अर लखपति दीदियां ने नुवा साल री शुभकामनावां देवता कह्यो के सरकार महिलावां अर काश्तकरां ने मजबूत बणावेला अर गांवांई उद्यमशीलता ने बधावो देवेला।

000

केंद्र सरकार चार नुवी श्रम संहितावां सारु मसौदा नियमां ने अधिसूचित कर दिया है। इण मांय मजदूरी संहिता 2019, औद्योगिक संबंध संहिता 2020, सामाजिक सुरक्षा संहिता 2020 अर व्यावसायिक सुरक्षा, स्वास्थ्य और कार्य परिस्थिति संहिता 2020 भेळा है। आं कानूनां मांय गिग वर्कर समेत दूजा मजूर,

मजदूरी, रूजगार रा तरीका, ग्रेच्युटी, बोनस अर सामाजिक हिफाजत ने परिभाषित करी ज्या है। आ मसौदा नियमां माथे सगळा हितधारक 45 दिन मांय आप री आपत्ति अर सुझाव दर्ज कर सके है।

000

दुनिया भर मांय नुवो साल 2026 धूमधाम रे साथे मनायो जावे। राष्ट्रपति द्रौपदी मुर्मु, उपराष्ट्रपति सी पी राधाकृष्णन, प्रधानमंत्री नरेन्द्र मोदी अर लोकसभा अध्यक्ष ओम बिरला ई मौके लोगां ने शुभकामनावां दी है। राष्ट्रपति आप रा संदेश मांय कह्यो कि नुवो साल, नुवी ऊर्जा अर सकारात्मक बदलाव रो प्रतीक है। उपराष्ट्रपति सोशल मीडिया पोस्ट मांय आस जतायी के ओ साल सगळा सारू शांति, स्वास्थ्य, सुख अर समृद्धि ले र आवेला। प्रधानमंत्री आशा जताई के नुवो साल सगळा सारू चौखो स्वास्थ्य अर और समृद्धि लावेला। लोकसभा अध्यक्ष ओम बिरला सोशल मीडिया माथे वीडियो संदेश साझा करता लोगां ऊँ कह्यो है के सगळा आप रा जीवन मांय सकारात्मक बदलाव लावे, तरक्की करे अर देश रा विकास मांय सक्रिय योगदान देवे। राज्यपाल हरिभाऊ बागडे आप रा शुभकामना संदेश मांय प्रदेशवासियां ऊँ नुवा साल मांय हर पल दिन कुछ नुवो करता देश अर समाज सारू आप रो ठावो देवण री अरज करी है। वठे ई मुख्यमंत्री भजन लाल शर्मा पूंछरी का लौठा रा श्रीनाथजी मन्दिर मांय पूजा-अर्चना कर प्रदेशवासियां री खुशहाली री कामना करी। विधानसभा अध्यक्ष वासुदेव देवनानी ई प्रदेश रा लोगां ने नुवा साल री शुभकामनावां दी है। ई बीचे प्रदेश मांय नुवां साल माथे मिन्दरां मांय भीड़ री। जयपुर रा मोती डूंगरी गणेश मन्दिर, गोविन्द देव जी मन्दिर समेत न्यारा-न्यारा मिन्दरां मांय श्रिद्धालु पूजा-अर्चना करी। धौलपुर, अलवर, सर्वाईमाधोपुर, कोटा, झुन्झुनू अर दूजा ठौड़ा ई मिन्दरां मांय श्रिद्धालुआं री कतार लागी री। रामदेवरा मांय नुवा साल रे मौके बाबा रामदेव रा दरबार मांय फूलां ऊँ खास सजावट करी ज्यी। दूजी कानी प्रदेश री नामी दर्शन जोग ठौड़ा माथे नुवा साल रे पैले दिन सैलाणियां रो जमावड़ो रियो। होटलां अर रेस्टोरेन्ट मांय ई लोगां री भीड़ री।

000

लोकसभा अध्यक्ष ओम बिरला आज बून्दी मांय नुवा बण्या टाउनहॉल रो लोकार्पण कर्यो। श्री बिरला कह्यो के हलका मांय साल 2026 मांय विकास रा नुवा आयाम गढ़्या जायेला। लोकसभा हलका मांय सैलाणियां री अपार आस तलाशी जावे। अजै ई अभ्यारण मांय बाधिन ने एयरलिफ्ट कर ने लायी ज्या है। पाणी रे भरपूर होवण रे साथै दिल्ली मुंबई कॉरिडोर रे नजदीकी होवण रे कारण आवण वाळा बगत मांय एगो बेस्ट इंडस्ट्री ने बधावा माथे ज़ोर दियो जावेला। वणा कह्यो के लोगां सारू स्वास्थ्य सुविधावां मांय ई इज़ाफो कर्यो जायेला।

.....

लोकसभा अध्यक्ष बून्दी रा श्री मान्धाता बालाजी मेळा महोत्सव मांय ई सिरकत करी।

000

प्रदेश रा केई जिलां मांय लारली रात अर आज संवारा मावठ व्ही। केई जिलां मांय बादळ छायाी ज्या रिया, वठे ई केई ठौड़ा घणा कोहरा रे कारण जिन्दगी माथे असर पड़्यो है। श्री गंगानगर अर हनुमानगढ़ मांय संवारा घणो कोहरा छायो रियो। सूरज रा दर्शन नी व्हेवण अर हल्का छाटा-छिडका रो दौर चालण ऊँ ठण्ड रो असर बध ग्यो। दौसा अर सर्वाईमाधोपुर रा केई हलका मांय आज ई मावठ व्ही। धौलपुर जिला मांय नुवा साल री सरूआत करड़ी ठण्ड रे साथै व्ही। संवारा सीळी हवां रे साथे कोहरो छायो रियो। कोटा जिला मांय आज मावठ होवण ऊँ मौसम रो मिज़ाज बदल ग्यो। जिला मांय केई ठौड़ा रिमझिम अर केई ठौड़ा मझला दर्जा री बिरखा व्ही। मौसम विभाग मेहकमां आवता दो-तीन दिन केई हलकां मांय घणो कोहरो छायो रहवण री आस जतायी है। मेहकमां आज केई जिला मांय हलका बिरखा अर आकाशीय बिजली पडण सारू अलर्ट काड्यो है। मेहकमां रा निदेशक ने बताया के आवण वाळा दो-तीन दिन तापमान मांय कमी रा आसार है।

000

भीलवाड़ा जिला मांय आज एक सड़क हादसा मांय तीन लोगां री मौत व्हे गयी। ओ हादसो बिगोद थाना हलका मांय भीलवाड़ा-कोटा राजमार्ग माथे डंपर रे कार ने टक्कर मारण ऊँ व्ह्यो। हादसा मांय दो लोग गहरा घायल व्हे ग्या। जिण रो उदयपुर रा अस्पताल मांय ईलाज चाले।

000

राजस्थान रोडवेज जात्रियां ने चोखी अर हिफाजती जात्रा सुविधा मुहैया करावण रा मकसद ऊँ मेरी बस मेरी जिम्मेदारी अभियान चलावे। निगम री अध्यक्ष शुभ्रा सिंह बतायो के अभियान रा तैत बसां मांय जात्री सीट, इलेक्ट्रिक काम, अग्निशमन यंत्र, आपातकाल द्वार ने ठीक करवायी ज्या है। साथै ही निगम कानी ऊँ सगळी बसां री छत ऊँ लगेज हटवा दीरीज्या है।

पेंशन फंड नियामक अर विकास प्राधिकरण अनुसूचित वाणिज्यिक बैंकां ने राष्ट्रीय पेंशन प्रणाली रा बन्दोवस्त सारु स्वतंत्र रूप ऊँ पेंशन फंड थापित करण ने मंजूरी दे दी है। अब अ बैंक पेंशन फंड रा प्रायोजक बणण रा ई पात्र व्हेला। प्राधिकरण पेंशन फंड सारु निवेश प्रबंधन शुल्क संरचना मांय ई बदलाव कर्या है।

000

प्रधानमंत्री मातृ वंदना योजना रा आज नौ साल पूरा व्हे गया है। आ योजना पैली जनवरी 2017 ने आसवाळी अर स्तनपान करावण वाळी मातावां ने वां रा स्वास्थ्य और पोषण मांय सुधार सारु रोकड़ मदद देवण रा मकसद ऊँ सरु करी ज्यी ही।

000